

METRO (SETEMPAH) 20 NOV 2015 M/S 22

## Bendung 'trend' tidak sihat

**Kuala Lumpur:** Cadangan mengharamkan pengguna vape di universiti tempatan oleh Kementerian Pengajian Tinggi, memang tepat dalam usaha mengurangkan 'trend' tidak sihat itu daripada terus berleluasa.

Timbalan Naib Canselor Hal Ehwal Pelajar dan Alumni Universiti Malaysia Pahang Profesor Datuk Dr Yuserrie Zainuddin berkata, penggunaan vape di kampus tidak wajar dan kesalan itu sama seperti menghisap rokok.

Beliau berkata, pihak universiti menyambut baik cadangan kerajaan dalam usaha mengekang budaya tidak sihat itu daripada terus berleluasa, pihaknya menguatkuasa larangan kepada pelajar tidak menggunakan vape di kawasan kampus.

"Pihak universiti mahu mewujudkan suasana pembelajaran yang lebih kondusif dan selesa, namun jika ada individu sewenang-wenangnya menghisap vape di kawasan kampus, ia sudah pasti mengganggu tumpuan pelajar lain yang mahu mengulangkaji pelajaran."

"Sebelum ini, pihak universiti sudah melarang penggunaan vape di kawasan kampus dan menerusi pengharaman oleh kementerian itu, penguatkuasaan boleh dilakukan lebih menyeluruh lagi," katanya, ketika dihubungi, di sini, semalam.

Selain itu, beliau berkata, pihaknya akan mengenakan



DR Yuserrie Zainudin

denda atau tindakan disiplin terhadap mana-mana pelajar yang didapati menghisap vape di kawasan kampus bagi mengekang kegiatan tidak sihat daripada terus berleluasa.

Sementara itu, Pensyarah Fakulti Perubatan Universiti Teknologi Mara (UiTM) Dr Siti Munira Yasin berkata, pengharaman vape oleh Kementerian Pengajian Tinggi memudahkan pihak universiti mengubah polisi masing-masing untuk mengambil tindakan terhadap pelajar atau individu yang menggunakan di kawasan kampus.

"Setakat ini, pihak universiti hanya boleh melarang individu daripada menggunakan vape di kawasan kampus, namun tidak boleh mengambil tindakan susulan seperti denda kerana polisi yang dirangka sebelum ini tidak menyenaraikan perkara itu," katanya.